



CINQVIEME SERMON.

MARC XVI.

v. 19. Le Seigneur apres avoir parlé à ses disciples, fut esleué en haut au ciel, & s'assit à la dextre de Dieu.



A V Symbole des Apostres il y a trois articles qui parlent de l'humiliation de Iesus Christ, aſçavoir l'article de sa conception & naissance, par laquelle il a pris forme de seruiteur; & sa mort, & sa sepulture, qui est le dernier & extreme degré de son humiliation. A cestrois articles le Symbole en adjouſte trois, qui parlent de son surhanſſement & exaltation. Ces trois articles sont sa resurrection, son ascension, & sa ſeſſion à la dextre de Dieu.

Ces articles sont liez ensemble d'un lien naturel. Car la naissance du Seigneur est son entree au combat. Sa mort est le fort du combat. Sa resurrection est sa victoire. Son ascension est le triomphe apres la victoire. Sa ſeſſion à la dextre de Dieu est le fruit de sa victoire, aſçavoir l'Empire qu'il

qu'il a receu du Pere sur toutes creatures. Vous ayant esté souuent parlé de sa naissance, mort & resurrection, nous nous propofons, moyennant l'assistance de Dieu, de vous parler de la gloire de son ascension, par laquelle il s'est assis à la dextre de Dieu son Pere.

L'histoire de son ascension est recitee plus au long au premier chapitre des Actes, où il est dit qu'une nuee le soustenant, il fut emporté de deuant les yeux de ses disciples, & que *deux Anges en vestemens blancs se presenterent deuant eux, disans, Hommes Galileens, pourquoy vous arrestez regardans au ciel? Ce Iesus qui a esté enleué en haut d'avec vous au ciel, viendra ainsi que vous l'avez contemplé allant au ciel.*

S. Luc disant qu'une nuee le soustenoit, parle selon qu'il sembloit & apparoissoit à ses disciples. Car il est certain qu'il n'a pas esté porté iusqu'au ciel souverain sur une nuee, veu que les nuees ne peuuent paruenir iusqu'au ciel. Une nuee eust esté un bien foible soustien. Iesus Christ est monté au ciel par sa propre puissance. Ioint que comme la flamme tend tousiours en haut, aussi les corps glorieux & immortels tendent necessairement vers le ciel. Sans doute durant les quarante iours que le Seigneur a conuersé ici bas depuis sa resurrection, son corps auoit son inclination vers les choses d'en haut. Ses pensees & ses desirs tendoyent vers les cieux. Mais il est demeuré quarante iours sur terre pour l'instruction de ses disciples, & pour leur donner des preuues certaines de sa resurrection.

Pour sçauoir quel est le ciel auquel il est mon;

té, faut sçauoir que l'Escriture nous parle de trois
cieux. Il y a le ciel le plus bas de tous, qui est l'air
& toute la region elementaire, depuis la Lune
iusqu'à la terre. En ce sens les oiseaux sont sou-
uent appelez *oiseaux du ciel*. Et en l'histoire du
deluge il est dit, *que les ventailles du ciel furent ou-*
uertes. Et au 1. liu. des Rois, ch. 8. *Quand les cieux*
seront resserrez, & qu'il n'y aura point de pluye.

101 f. 35.

Par dessus ce premier ciel, il y en a vn deuxie-
me, asçauoir le ciel où est le Soleil, la Lune, & les
estoilles. Duquel est parlé au 8. Pseaume, *Quand*
ie regarde tes cieux l'ouurage de tes doigts, la Lune
& les estoilles que tu as agencees.

Mais par dessus ce deuxieme ciel il y en a vn
troisieme, où Dieu a posé son throne, & où est
l'habitation eternelle des esprits bien heureux.
Ce lieu au 12. chapitre de la deuxieme aux Corin-
thiens est appelé le troisieme ciel, & le para-
dis, c'est à dire vn jardin de plaifance; Les An-
ges appellent ce ciel-la, les *lieux treshauts*, disans,
Gloire soit à Dieu es lieux treshauts, Luc 2. Ce
mesme ciel est appelé souuent *les cieux des cieux*,
pource qu'ils comprennent & environnent les
autres cieux: en mesme sens que l'Eternité est ap-
pelee les *siecles des siecles*, pource qu'elle com-
prend & enclost tous les siecles. Quand il est dit
Actes 7. Que S. Estienne vit les cieux ouuerts,
faut entendre les cieux inferieurs, à trauers des-
quels ce saint Martyr apperceut Iesus Christ as-
sis à la dextre de Dieu. Mais quand nous sommes
appelez bourgeois des cieux: & quand nous di-
sons, *Ta volonté soit faite en la terre comme au*
ciel, nous entendons parler du troisieme ciel. Car
nous

101 f. 14.

nous demandons que Dieu soit serui en terre avec pareille pureté & promptitude qu'il est serui au ciel par les esprits bien heureux. Ce troisieme ciel est different du ciel où sont les Astres, pource que les Astres se meuuent incessamment. Mais le ciel souuerain est en vn perpetuel repos. Les autres cieux periront : mais cestui-la ne perira iamais. Là il fait clair sans Soleil. La lumiere qui luit ne fait point d'ombre. Là est, comme dit S. Paul aux Colossiens 1. *l'heritage des saints en la lumiere.* Lesquels y reçoient la lumiere de tous costez, comme si quelcun estoit tout œil, & y resplendissent comme le Soleil au royaume de leur Pere, *Matth. 13.*

C'est en ce ciel souuerain auquel Iesus Christ est monté corporellement, comme dit l'Apostre aux Hebrieux chapitre 7. *Il nous conuenoit auoir vn tel Souuerain Sacrificateur, qui fust saint, innocent, sans macule, separé des pecheurs, exalté par dessus les cieux.* Et S. Paul, Ephes. 4. *Il est monté sur tous les cieux, afin qu'il accomplist toutes choses.* Et est monté d'une ascension réelle, & non Metaphorique ou imaginaire. Il a porté dans les cieux ce vray corps qu'ils a pris au ventre de la Bien heureuse Vierge, auquel la glorification a osté l'infirmité, mais ne lui a pas osté la nature.

A cette ascension au ciel l'Escriture quelque fois oppose la descente de Iesus Christ en terre. Au 3. chapitre de S. Iean le Seigneur parle ainsi, *Nul n'est monté au ciel que celui qui est descendu du ciel, a sauoir le Fils de l'homme, qui est au ciel.* Et S. Paul aux Ephes. chapitre 4. *Celui qui est descendu, c'est le mesme qui est monté sur tous les cieux.* Ne

faut pas s'imaginer que comme Iesus Christ est monté localement & corporellement, au ciel, qu'aussi son corps soit descendu du ciel au ventre de la Vierge. Cette descente du Fils, n'est autre chose que sa manifestation en chair, laquelle humiliation est vne espece de descente. De laquelle *Ephes. 4. 9.* S. Paul au mesme lieu dit, *qu'il est descendu és parties plus basses de la terre* : qui est la mesme façon de parler de laquelle Dauid s'est serui au Pseaume 139. où parlant de sa conception au ventre de sa mere, il dit, *l'ay esté fait en lieu secret, & façonné és bas lieux de la terre.*

Or ne faut douter que les Anges n'ayent receu Iesus Christ entrant au ciel avec l'honneur & reuerence qu'ils doiuent à leur Maistre & Seigneur. Car s'il y a ioye au ciel pour vn pecheur conuerti, combien plus pour vn pecheur receu en la gloire celeste ? Et combien plus pour l'exaltation du Redempteur de tant d'ames, entrant au ciel pour prendre le gouuernail du monde ; mesme entant qu'homme, & y regner eternellement ? Si lors que Iesus Christ est né avec infirmité & opprobre, ils ont chanté en triomphe, disans, *Gloire soit à Dieu és lieux treshauts, en terre paix, enuers les hommes bonne volonté*, combien plus se sont-ils esiouïs quand il est entré au ciel chargé des despouilles des enfers, & deschargé d'infirmité ?

Or entre les Saincts qui sont en possession de la gloire celeste, il y en a trois qui y sont en corps, asçauoir Enoch, Elie, & Iesus Christ. Enoch, qui a vescu en terre deuant la Loy. Elie, qui a vescu sous la Loy. Et le Seigneur Iesus, qui a esté ci
bas

bas sous l'Euangile, dont il a esté le heraut & le moyennneur. Semble que Dieu ait voulu que de chacun de ces siecles il y ait en Paradis vn homme qui y soit en corps, afin que les ames de chaque siecle ayent vn exemple de leur condition future, & vne assurance que leurs corps leur seront rendus, & iouiront vn iour de la gloire celeste.

Maintenant apprenez les causes pour lesquelles il a fallu que Iesus Christ montast au ciel. Tout ainsi qu'un Medecin venu de loin pour guerir vne maladie qui infecte vne ville, s'en retourne en son pays apres qu'il a acheué l'œuvre pour laquelle il estoit venu: Ainsi Iesus Christ est monté au ciel, d'où il estoit venu, apres auoir acheué l'œuvre de nostre redemption, comme il dit lui mesme à son Pere au 17. de S. Iean, *Je t'ay glorifié sur la terre: j'ay paracheué l'œuvre que tu m'as baillé à faire. Maintenant glorifie moi de la gloire que j'ay eüe par deuers toy deuant que le monde fust fait.* A vn corps glorieux, vne demeure glorieuse est conuenable. Il n'estoit pas conuenable que le Saint de Dieu demeurast perpetuellement parmi les vices & ordures de ce siecle. Celui qui est le Roy des cieus eust il tousiours demeuré en terre dans le regne du diable, veu que le temps d'abolir le regne du diable, déterminé au conseil de Dieu, n'estoit encore venu?

Falloit aussi que ce qui estoit figuré sous l'ancien Testament fust accompli, selon que l'enseigne l'Apostre aux Hebreux aux 9. chapitre. Le Souuerain Sacrificateur entroit avec sang dedans le sanctuaire, portant sur son cœur & sur ses

espaules les noms des douze lignees d'Israel, & y faisoit la propitiation pour les pechez du peuple, laquelle estant acheuee, il retournoit au paruis vers le peuple qui l'attendoit. Ainsi Iesus Christ nostre Souuerain Sacrificateur est entré au Sanctuaire celeste, presentant au Pere son sang, c'est à dire, sa mort pour faire la propitiation pour nos pechez; nous portant en son cœur, & s'estant chargé de nos douleurs, & ayant porté nos pechez en son corps sur le bois. Là il intercede pour nous, tant que la propitiation acheuee il retourne à ceux qui l'attendent, & se fient en sa redemption.

L'Escriture nous enseigne plusieurs autres fruits que nous receuons de l'ascension du Seigneur. Au 14. chapitre de S. Iehan le Seigneur Iesus se disposant pour retourner à son Pere, dit à ses disciples, *Je m'en vay vous apprester lieu.* Car sans la mort, resurrection, & ascension du Seigneur, le ciel nous seroit fermé, & serions exclus du Royaume des cieux. *C'est lui qui ouvre, & nul ne ferme, Apocalypse 3. 7.* Non pas que nul des Peres de l'Ancien Testament ne soit entré en la gloire celeste auant l'ascension de Iesus Christ. Nous auons l'exemple du brigand crucifié avec Iesus Christ, lequel a esté receu en Paradis avec Iesus Christ quarante iours auant l'Ascension du Seigneur. Nous auons l'exemple de Lazare, duquel l'ame a esté portée par les Anges au sein d'Abraham, où il est consolé. Car que par cette consolation est entendue la ioye des esprits bien heureux, appert parce qu'elle est opposée aux tourmens du riche glouton tourmenté és enfers.

Est-

Est-il croyable que sous le Vieil Testament les ames des meschans ayent esté precipitees és enfers incontinent apres leur mort, mais que les ames des saincts Patriarches & Prophetes ayent esté renfermees en vne prison obscure sous terre, cloignees de la veüe de Dieu? Dieu prendroit il plaisir à haster le tourment de ses ennemis, & à dilayer par plusieurs sieles le salut & la beatitude de ses enfans? Au 2. chapitre de Sainct Luc Simeon tenant Iesus Christ nouveau né entre ses bras, demande à Dieu qu'en mourant il fust receu en la paix de Dieu, selon que Dieu lui auoit promis. Eust-il demandé à Dieu d'estre enfermé en vne prison obscure sous terre? Dauid au Pseaume 73. dit à Dieu, *Tu me conduiras par ton conseil, & puis me recevras en gloire.* Et au Pseaume 49. *Dieu rachetera mon ame de la puissance de la mort quand il me prendra à soy.* Salomon au 3. chap. de l'Ecclesiaste dit que l'esprit de l'homme monte en haut. Et au 12. chap. il dit que *l'esprit retourne à Dieu qui l'a donné.* vers. 9.

Les Peres de l'Ancien Testament ont esté sauués par la redemption en Iesus Christ, comme dit S. Pierre au 15. chapitre des Actes, *Nous croyons que nous serons sauués par la grace de Iesus Christ, comme eux aussi.* Et l'Apostre, Hebreux chap. 9. dit que *la mort de Iesus Christ est entreuenue pour la rançon des transgressions commises sous le nouveau Testament.* Et S. Paul, Galatés 3. dit qu'il a esté euangelisé à Abraham. Dont aussi Iesus Christ dit qu'*Abraham a veu le iour du Seigneur, & s'en est esiouï,* Iean 8.

Ceci aussi est vn des fruiets de l'Ascension

G

de Iesus Christ, à sçauoir qu'il intercedast pour nous. Et comme dit l'Apostre aux Hebreux chapitre 4. *Il est entré au ciel pour comparoistre pour nous deuant la face de Dieu.* Et l'Apostre S. Paul Romains 8. *Christ est à la dextere de Dieu, & fait requeste pour nous.* Ce qui toutefois doit estre saine-ment entendu. Car il ne faut pas s'imaginer que Iesus Christ intercede pour nous, ou prie pour nous, alleguant à son Pere des raisons persuasives, ou des prieres pour faire changer d'avis à son Pere, ou appaiser sa colere, ou le flechir à compassion & misericorde. Cela ne peut estre. Si cela estoit, le Fils auroit plus d'inclination à nous aimer que le Pere. Et Dieu seroit suiet à changement. Ses conseils sont immuables, & sa volonté irreuocable. Il ne peut estre flechi par raisons & persuasions. Et mesme il est certain que l'amour que le Pere nous a porré marche en ordre de nature, deuant l'intercession du Fils: car c'est l'amour & bonté du Pere qui est cause de l'enuoy de Iesus Christ au monde pour nous racheter: comme dit Iesus Christ au 3. chapitre de S. Iean, *Dieu a tant aimé le monde, qu'il a donné son Fils, &c.*

Voici donc comment Iesus Christ intercede pour nous. C'est que la mort de Iesus Christ & sa redemption, compatoist perpetuellement en la presence de Dieu: & que le bien que Dieu fait à ses eleus, il le fait en consideration de son Fils. S. Iean au 2. chapitre de sa premiere Epistre nous enseigne cela. Car ayant dit que nous auons vn Aduocat enuers le Pere, à sçauoir Iesus Christ; il monstre comment il est nostre Aduocat,

cat, adioustant, *Car c'est lui qui est la propitiation pour nos pechés.* Et S. Paul en la premiere à Timothee chapitre 2. dit que nous auons un seul Moyenneur entre Dieu & les hommes, adjouste, *Qui s'est donné en rançon pour nous.* En cela donc Iesus Christ est nostre Moyenneur, entant qu'il s'est donné en rançon pour nous par sa mort. Celui qui a compris cela soudra aisément vne difficulté que la raison humaine meut, demandant comment Iesus Christ peut estre nostre Aduocat, veu qu'il est nostre Iuge? Car Iesus Christ n'est pas nostre Aduocat en plaidant à la façon des hommes, mais en fournissant au Pere matiere de nous bien faire. Or n'y a point d'inconuenient ni d'absurdité à dire que Iesus Christ fournit à soy mesme aussi bien qu'au Pere matiere de nous bien faire. Ioint qu'il y a vn temps auquel il fera office de Iuge, sans faire office d'Aduocat, comme au iour du dernier iugement.

C'est donc là vn des fruiets de son ascension, à sçauoir qu'il intercede pour nous. L'Escripture ne nous parle point d'autre Mediateur qui presente à Dieu nos requestes, *Nous auons un Dieu & un Moyenneur entre Dieu & les hommes, à sçauoir Iesus Christ homme.* 1. Timothee 2. *Il n'y a point de salut en aucun autre qu'en Iesus Christ, & n'y a point d'autre Nom sous le ciel qui soit donné aux hommes par lequel il nous faille estre sauués,* comme dit S. Pierre au 4. chapitre des Actes. Et Iesus Christ nous dit, *Nul ne vient au Pere sinou par moy,* Iean 14. Pour faire que nos prieres soyent faites en foy, il faut que Dieu les ait commandées, & qu'elles soyent fondees en sa parole:

Car la foy est de lonie de la parole de Dieu, Romains 10.

Voici encore d'autres fins & fruiçts de l'Ascension du Seigneur. Par cette Ascension il a triomphé du diable & des enfers. En elle nous auons l'accomplissement de la prophetie de Dauid au Pſeume 68. *Tu es monté en haut, tu as emmené captiue multitude de captifs, & as donné dons aux hommes*: comme Sainct Paul enseigne Ephes. chap. 4. Ces dons sont les mesmes dons dont Iesus Christ parle aux 15. & 16. chapitres de S. Iean, disant, *Il vous est expedient que ie m'en aille. Car si ie m'en vay, ie vous enuoyerai le Conſolateur, qui demeurera avec vous eternellement*. Il a osté de la terre ce qu'il a pris entre nous, à ſçauoir son corps, & nous a donné en contreschange ce qu'il a receu du Pere, à ſçauoir son Esprit. Que si l'Apostre aux Colossiens chapitre 2. dit, que le Seigneur en la croix a triomphé des puissances ennemies, & les a menées publiquement en monstre, combien plus a-il triomphé d'elles par son Ascension glorieuse, & session à la dextre de Dieu?

L'Apostre aux Ephesiens chapitre quatriesme nous baille vn autre fruiçt de l'Ascension du Seigneur, disant qu'il est monté sur tous les cieux pour accomplir toutes choses; c'est à dire, pour accomplir ce qui reſtoit à accomplir des figures & des propheties qui ont parlé de lui. Notamment cette prophetie du 68. Pſeume, *Tu es monté en haut, tu as emmené captiue multitude de captifs, & as donné dons aux hommes*. Car quand Iesus Christ en rendant l'esprit en croix a dit,

dit, *Tout est accompli*, faut entendre cela des combats & douleurs qu'il auoit à souffrir. Car plusieurs choses restoyent encore à accomplir, comme la resurreccion, son ascension, la session à la dextre de Dieu, & son retour à nous au dernier iour. Le mot Grec dont l'Apostre s'est serui en plus de cinquante passages, signifie *accomplir*, & non pas *remplir*. Dire que Iesus Christ est monté au ciel, afin de remplir toutes choses, semble que c'est vouloir que le corps du Seigneur soit present par tout.

Reste encore vn fruiçt de son ascension ; à sçauoir l'elevation de nos pensees & de nos desirs apres Iesus Christ, afin que comme il a laissé la terre par son ascension, nous aussi esloignons nos affectiõs des choses terriennes. Qui est l'exhortation de Sainct Paul aux Colossiens au chapitre 3. *Si vous estes resuscitez avec Christ, cherchez les choses qui sont en haut, où est Iesus Christ assis à la dextre de Dieu.* Et aux Philippiens au 3. chap. *Nostre conuersation est de bourgeois des cieux, d'où nous attendons le Sauueur, à sçauoir Iesus Christ.* Car nous n'auons aucune vertu qui serue à salut que par nostre conformité avec lui, vous ne pouuez estre sauués, si vous n'estes rendus conformes à la mort de Iesus Christ par la mortification de vos affectiõs charnelles, par laquelle vostre vieil homme soit crucifié. Aussi vous ne pouuez estre sauués si vous n'estes rendus cõformes à la resurreccion par vne nouveauté de vie. Il est le mesme de son ascension. Car vous ne pouuez estre sauués si vostre vie n'est vne ascension continuelle par laquelle vous eleuiez de

plus en plus vos pensées & affections vers les choses celestes, où Iesus Christ est monté deuant nous, afin de nous apprester lieu. Tout ainsi qu'à celui qui est esleué au plus haut des Alpes, les villes de la platte campagne semblent estre des petites cabanes, & les maisons Royales à peine paroissent, ainsi à celui qui a ses pensées & desirs eleués vers leciel, les choses les plus grandes de ce monde semblent contempribles. Il les confidere avec vn mespris meslé de compassion. Or pource que l'eleuation de nos cœurs est fort lente, d'autant que le poids de cette chair & de l'amour du monde nous tire en bas, & que les richesses, & les commodités temporelles, & l'amour de nos proches, comme femmes & enfans, sont comme autant de racines par lesquelles nous sommes attachés à cette terre, souuent Dieu coupe quelcune de ces racines, nous ostant nos biens, & nous visitant de povreté. Ostant à vn mari sa femme, ou à vn pere ses enfans, qui retenoyent ses affections attachees à cette terre, afin qu'il tourne tout son amour & ses esperances vers Dieu, & ait deormais son esprit occupé es choses d'enhaut; & que là où est son thresor, là aussi soit son cœur & son affection.

Mais deuant que de sortir de ce propos, il est necessaire que la parole de Dieu nous enseigne comment Iesus Christ a laissé ce monde, & comment son corps s'est retiré d'ici bas. Il y a eu iadis des heretiques qu'on appelloit Eutychiens, qui à cause de l'vniõn personnelle de la nature humaine de Iesus Christ avec la diuine, ont soustenu que par tout où est la nature diuine de Iesus

Iesus Christ, là aussi est sa nature humaine. Aufquels ont succédé ceux qui en ce temps tiennent que le corps de Iesus Christ est present par tout. Le Seigneur Iesus nous instruit là dessus. Car au 12. chapitre de S. Iean il dit à ses disciples, *Vous aurez tousiours les poures, mais vous ne m'aurez pas tousiours.* Et estant prest de monter à son Pere, il disoit, *Maintenant ie ne suis plus au monde,* Iean 17. Et Iean 16. *Je laisse le monde, & m'en vray au Pere.* Et est grandement à noter, que pour consoler ses disciples de son depart, il ne leur dit pas, *Je demeurerai avec vous, estant present par tout.* Mais il les console, en ce que se retirant d'avec eux, il leur enuoyera le S. Esprit, qui est le Consolateur. Et S. Pierre au 3. chapitre des Actes dit qu'il faut que le ciel le contienne iusqu'au temps du restablissement de toutes choses, qui est le iour du iugement. On veut qu'il s'en soit allé, & qu'il n'ait bougé: Que son corps soit monté au ciel, & soit demeuré en terre. Certainement le Symbole disant, *Il est monté au ciel, & de là viendra iuger les viuans & les morts,* manifestement remet son retour & sa presence en corps iusqu'au iour du iugement.

Bien est vray que Iesus Christ au 28. chapitre de S. Matthieu dit qu'il sera avec nous iusqu'à la fin du monde. Mais il ne parle pas de sa presence corporelle, mais de l'assistance continuelle de sa vertu diuine: en mesme sens qu'il promet que *là où il y aura deux ou trois assemblés en son Nom, il sera au milieu d'eux.* Il parle d'une presence favorable par son Esprit, qui ne conuient qu'à ceux qui l'aiment & le craignent.

*Della Sef-
fion à la
dextre de
Dieu.*

Ce font là, mes freres, les choses que nous auons à vous dire sur l'ascension glorieuse de nostre Seigneur & Sauueur Iesus Christ, par laquelle estant monté au ciel, il s'est assis à la dextre de Dieu son Pere, qui est le souuerain degré de son exaltation. Car par cette session à la dextre de Dieu est entendu le souuerain empire qu'il a receu de Dieu, par lequel toute puissance lui est donnée au ciel & en la terre. L'Apostre aux Ephesiens chapitre premier interprete ainsi cette session à la dextre de Dieu, *Dieu l'a resuscité des morts, & l'a fait seoir à sa dextre es lieux celestes, par dessus toute principauté & puissance, & a assuietti toutes choses sous les pieds d'icelui.* Dieu mesme interprete ainsi ces mots au Pl. 110. où le Pere est introduit disant à son Fils, *Sieds toy à ma dextre, iusqu'à tant que i'aye mis tes ennemis pour marche pied de tes pieds.* Et est cette façon de patler prise de la coustume des Rois, qui font asseoir pres d'eux ceux qu'ils veulent honorer. Ainsi Salomon fit asseoir sa mere à sa main droite pour l'honorer, 1. Rois 2.

Ce titre d'estre assis à la dextre de Dieu n'est point donné aux Anges, comme dit l'Apostre aux Hebreux au 1. chapitre, *Auquel des Anges a-il onques dit, Sieds toy à ma dextre?* &c. Vray est qu'au 3. chapitre de l'Apocalypse Iesus Christ dit, *Qui vaincra, ie le ferai seoir avec moy en mon throne.* Mais là par le throne de Iesus Christ est entendue seulement la gloire celeste, & non l'empire sur les Anges, & sur toutes creatures. Car quant à l'empire sur tout le monde, cette dignité est incommunicable à la creature.

As

Au chapitre 19. de S. Matthieu Iesus Christ dit à ses disciples, *En verité ie vous di, que vous qui m'avez suivi en la regeneration, quand le Fils de l'homme sera assis au throne de sa gloire, vous aussi serez assis sur douze thrones, iugeans les douze lignees d'Israel.* Duquel passage quelques vns recueillent que les Apostres iugeront le monde avec Iesus Christ au iour du iugement, & seront assis sur des thrones, comme iuges. Mais c'est mal entendre les paroles du Seigneur, lequel ne dit pas, Vous serez assis sur douze thrones quand le Fils de l'homme viendra pour iuger le monde, mais quand le Fils de l'homme sera assis au throne de sa gloire, laquelle seance il a prise lors qu'il est monté au ciel. Il parle de l'autorité que les Apostres auoyent apres son depart, lors qu'il seroit assis à la dextre de Dieu. Car les Apostres ont gouverné l'Eglise durant leur vie, & encore auioird'huy ils sont nos iuges. C'est à eux & à leurs escrits auxquels nous devons auoir recours és doutes & controuerses de la religion. Nous nous tenons à ce qu'ils en disent.

Or que tel est le sens de ce passage appert par les paroles de Iesus Christ au 21. chapitre de S. Luc, où parlant de ces douze thrones, il dit à ses disciples, *Je vous dispose le Royaume, comme mon Pere me l'a disposé.* Où est clair que le Seigneur parle de la puissance & autorité qu'il laissoit à ses Apostres en s'en allant au ciel. Tenez pour chose certaine qu'au iour du iugement les Apostres seront de ceux auxquels le souuerain Iuge dira, *Venez les benits de mon Pere, &c.* Il faut que nous comparoissions tous deuant le siege

judicial de Christ, 1. Corinthiens 5. Dieu seul est Iuge du monde, seul Iuge des consciences. Les Apostres ont esté pecheurs, & ont eu besoin que Dieu leur pardonnast. Prononcer iugement de condamnation sur vn throne en qualité de iuge, n'appartient qu'à Dieu. Que si au iour du iugement douze thrones sont dressez aux douze Apostres, où sera la place de l'Apostre S. Paul?

Pour donc entendre le sens de l'article de la Session de Iesus Christ à la dextre de Dieu, faut sçauoir que le mot de **S E O I R**, ou *estre assis*, souuent est pris pour regner & iuger: comme au Pseaume neuuiesme il est dit que Dieu s'est assis sur le throne, comme iuste Iuge. Et au premier chapitre du premier liure des Rois, Dauid ordonne que Salomon son fils soit assis sur son throne apres lui. Ainsi au dixhuitiesme chapitre de l'Apocalypse la grande paillardie dit, *Je sieds Roine, & ne suis point uesue, & ne verray point de duuil.*

Quand donc l'Escriture dit que Iesus Christ est assis à la dextre de Dieu, il ne faut pas vous imaginer qu'il soit assis les genoux pliez à la façon des hommes. Dont aussi S. Estienne mourant disoit, *Je voy Iesus Christ estant à la dextre de Dieu*, où ce mot **ESTANT** au Grec, qui est l'original, signifie *estant debout*.

Quant à ce mot de **D E X T R E**, puis que Dieu est esprit, il est certain qu'il n'a ni droite ni gauche. Mais l'Escriture parle des choses diuines en termes humains. Par les mains de Dieu elle entend ses actions. Par sa dextre elle entend sa puissance. Comme au Pseaume 118. *La dextre du*

Sei-

Seigneur est hautaine, la dextre du Seigneur a fait vertu. Et au 5. chapitre des Actes, *C'est celui que Dieu a eleué par sa dextre*, c'est à dire, par la puissance.

Quand donc il est dit de Iesus Christ qu'il est assis à la dextre de Dieu, c'est autant que ce que Iesus Christ dit de soi mesme au 28. ch. de saint Matthieu, *Toute-puissance m'est donnée au ciel & en la terre.*

A cela ne contrarie pas ce qui est dit au Pseaume 16. où Iesus Christ est introduit parlant, & disant, *Puis que l'Eternel est à ma dextre, ie ne seray point esbranlé.* Car par auoir Dieu à sa dextre, il entend auoir Dieu pres de soi pour sa defense.

Si on demande pourquoi l'Escriture ne dit jamais que le Saint Esprit, qui est Dieu, est assis à la dextre du Pere, mais que cette session n'est attribuee qu'au Fils, la raison est aisee à rendre. Car cette Session est attribuee au Fils, entant qu'il est Mediateur, & entant qu'homme: ce qui ne conuient pas à la personne du S. Esprit, duquel on ne peut dire, qu'il se soit assis à la dextre de Dieu: car ce seroit donner commencement à son Empire.

Ceux qui veulent que le corps de Iesus Christ soit present par tout, argumentent ainsi, La dextre de Dieu est par tout. Or le corps de Iesus Christ est à la dextre de Dieu. Donc le corps de Iesus Christ est par tout. Ils argumentent avec autant de raison, que si ie disois, Le monde est par tout. Or Antoine est au monde: donc il est par tout. S. Paul ne dit pas que Iesus Christ

est la dextre de Dieu, mais qu'il est à la dextre de Dieu. Si à cause de l'union personnelle de la nature humaine avec la diuine, le corps de Iesus Christ est par tout, faudra dire que quand il estoit au ventre de la Vierge Marie, il estoit en tous les ventres des femmes de tout le monde, & que quand il souffroit en croix, il estoit en infinis autres lieux où il ne souffroit rien.

De tout ce que dessus nous naissent plusieurs consolations & exhortations. Ce nous est vn grand suiet de ioye & d'vne sainte gloire, que nous auons vn frere au ciel de mesme nature que nous, qui tient le gouuernail du monde, & a toute puissance au ciel & en la terre. C'estoit vn grand suiet de ioye aux enfans de Iacob, qui n'estoyent que bergers, & estrangers, d'auoir vn frere, asçauoir Ioseph, gouuerneur de toute l'Egypte. Lequel toutefois ne leur faisoit point de part de ses charges, & ne les a point auancez en honneur. Combien plus auons nous suiet d'auoir vn frere, qui regne sur tout le monde, & nous appelle pour nous faire participans de sa gloire?

De là aussi nous tirons vne grande assurance contre les efforts du monde & du diable. Car nostre Sauueur est celui auquel le Pere a dit, *Sieds toy à ma dextre tant que i'aye mis tes ennemis le marche pied de tes pieds.* Nos ennemis sont en sa puissance, ils ne se peuent remuer sans sa permission.

Et tout ainsi qu'vn corps ne se noye iamais pendant que la teste est hors l'eau, aussi sommes nous assurez, que l'Eglise qui est le corps de
Christ,

Christ, ne perira iamais pendant que son Chef est haut eleué par dessus le deluge de maux qui inonde la face de la terre. *Il appaise quand il veut le bruit de la mer, & les emotions des peuples, Pseaume 65.*

Eleuons donc nos cœurs en haut, & avec les yeux de la foy, suiurons le Redempteur montant en haut : & eloignans nos pensees & nos desirs des choses terriennes, tendons au but de la vocation celeste, & à ce lieu où Iesus Christ nous attend; Afin que là où est nostre tresor, là aussi soit nostre cœur & nostre affection. Apres l'eleuation de nos pensees & desirs, il eleuera finalement nos ames, pour les approcher de sa presence, & les couronner de gloire & d'immortalité. A lui avec le Pere & le Sainct Esprit, soit gloire & louange és siecles des siecles. Amen.

